



Komunikadu Imprensa
Parlamentu Nasionál
19 Maiu 2020

JSMP preokupa ho funksionamentu Parlamentu Nasionál nian iha inísiu Maiu 2020

Iha inísiu Maiu 2020, tuir observasaun JSMP nian hatudu katak Parlamentu Nasionál la funksiona ho normál hodi halo reuniaun plenaria iha Segunda no Tersa-Feira no reuniaun Komisaun Espesializada Permanente sira-nian tuir Rejimentu Parlamentu.

“JSMP konsidera suspensaun ba reuniaun plenária PN sei fó efektu negativa ba produtividade Parlamentu Nasionál nian no sei afeita direita ba planu finalizasaun ezbosu lei pendente sira iha Parlamentu Nasionál nian ne’ebé durante ne’e estadu gasta ona orsamentu barak ba asesór no tékniku sira hodi elabora esbosu lei hirak ne’e. Aleinde ne’e, suspensaun ne’e mós viola provizaun Artigu 50 Rejimentu Parlamentu¹ nian kona-ba suspensaun reuniaun plenaria ne’ebé labele suspende liu loron 10,” dehan Sra. Ana Paula Marçal, Diretora Ezekutiva JSMP.

Ezbosu lei hirak ne’ebé mak pendente hela iha Parlamentu Nasionál mak hanesan Esbosu Lei Mineiru, Lei Anti Korrupsaun, Lei Orden Advogadu, Lei Podér Lokál no Desentralizasaun Administrativa no mós Lei Eletóral Assembleia Munisípal. Lei hirak ne’e sai prioridade política iha programa Governu Konstitusionál VIII nian iha âmbito reforma lezislativu nian.

Tanba ne’e, JSMP rekomenda ba líder Bankada Parlamentár sira atu tau prioridade ba esbosu lei pendente sira ne’e iha agenda ba reuniaun plenária sira tuir mai hodi bele aselera prosesu diskusaun no aprovasaun.

JSMP mós husu ba líder bankada sira atu tau prioridade ba agenda reuniaun Komisaun Espesializada sira ne’ebé iha responsabilidade ba diskute lezislasaun balun ne’ebé Meja Parlamentu baixa hela ba sira atu halo prosesu diskusaun no prepara paraser, liuliu Esbosu Lei Mineiru no Esbosu Lei Anti Korrupsaun ne’ebé baixa ona ba Komisaun A no Komisaun E hodi bele submete fali ba Meja PN hodi agenda iha reuniaun plenária atu hetan aprovasaun finál globál.

¹ http://www.mj.gov.tl/jornal/public/docs/2016/serie_1/SERIE_I_NO_18.pdf

Atu hetan informasaun liutan favor kontaktu direktamente:

Ana Paula Marçal

Diretóra Ezekutivu JSMP

Email: ana@jsmp.tl

Telefone: 77040735 | 3323883

Website: <http://jsmp.tl/>